

南漢金石志卷一

嘉應吳蘭修編

石版文 佚

胡賓王劉氏興亡錄高祖巖皇考葬段氏得石版有篆文曰隱台巖因名其三子

司馬光通鑑考異

蘭修按歐陽修五代史南漢世家劉龔謙庶子也母段氏生龔於外舍謙妻韋氏素妬聞之怒拔劍而出命持龔至將殺之及見而憐劍輒墮地良久曰此非常兒也後三日卒殺段氏養龔為己子考龔卒於大有十五年壬寅

晉天福七年

五十四由是推之當生於唐昭宗龍紀元年己

志一

酉卽葬段氏之年也南漢金石以是託始云

廣州石識 佚

人人有一山山值牛兔絲吞骨蓋海承劉

宋史南漢世家

廣南劉龔初開國營構宮室得石識有古篆十六字其文云云解者曰人人有一大人也山山出也值牛者龔建漢國歲在丑也兔絲者晟龔位歲在卯也吞骨者殺諸弟也越人以天水為趙蓋海指皇朝國姓也承劉者受劉氏降也

吳處厚青箱雜記

古劍文 佚

丁與水同宮王將耳口同尹來居口上山岫護重重

陳蓮羅浮山志

後唐天成中僞漢欽州羅浮山民掘得古劍有篆文曰己與水同宮王將耳口同尹來居水上山岫護重重以獻僞主劉陟國人莫之辨及平廣南競傳其言知者云太宗以己亥年降誕是己水同宮也於文耳口王爲聖尹口爲君重山爲出蓋己亥年聖君出也

馬端臨文獻通考

欽州羅浮山本名安京以形似惠州羅浮故改陳璉羅浮山志作丁與水同宮蓋太祖丁亥年生長太宗十二歲平嶺南乃太祖之世故以丁亥聖君出言非己亥明矣太宗繼體之君安得以出言乎璉所志山乃惠州羅浮也

黃佐嘉靖廣東通志

志一

二

康陵碑

佚

翰林學士知制誥正議大夫尙書右丞賜紫金魚袋臣盧應奉勅撰

維大有十五年歲次壬寅四月甲寅朔廿四日丁丑高祖天皇帝崩於正寢越光天元年五月癸未朔十四日丙申遷神於康陵禮也

朱彝尊曝書亭集

崇禎丙子秋廣州城東二十里北亭洲田間有雷出地奮而成穴耕者梁某投以石空空有聲內一雄雞其中逾夜雞鳴無恙乃發之有金人如翁仲者數枚各重十五六觔有二金像冕而坐者笄翟如后妃者各重五六十觔地皆金蠶珠貝苟有鏡

一光燭穴中寶硯一硯池中有玉魚能游泳他異物不可指識者甚眾梁攜歸光動四鄰鄰人覺而爭往遂白之官有司親臨發之隧道如城高五尺餘深三丈中有碑乃偽漢劉龔塚也文曰維大有十五年歲次壬寅四月甲寅朔廿四日丁丑高祖天皇大帝崩於正寢越光天五年五月癸未朔十四日丙申遷神於康陵禮也文多闕不盡載翰林學士知制誥正議大夫尚書右丞賜紫金魚袋臣盧應初撰并書按光天乃龔子玠年號玠立僅二年爲其弟晟所弒卽改光天二年爲應乾元年無光天五年又考十國春秋偽漢諸臣列傳止有盧

志一

三

膺仕龔爲工部侍郎晟時拜中書侍郎同平章事無應初名也

王士正皇華紀聞

竹垞記劉龔塚碑事與王文簡皇華紀聞所載頗有錯互余抵粵訪諸官吏與土人問其所謂北亭者在番禺城東二十里許而劉龔之塚與碑則竟無知者蓋二先生亦皆非得自親睹所以傳寫或有訛失卽如竹垞所記係光天元年而文簡則疑光天無五年而所據載者乃作五年

廣語亦作元年

又盧應下文簡所記是初字廣語所記是勅字俱無奉字而竹垞所記則多一奉字安知初字非卽勅字之誤乎竹垞稱陳元孝語予云云則是竹垞旣得

自口傳而元孝復出自記憶無怪乎傳聞異詞矣
翁方綱粵東金石畧

蘭修按曝書亭集結銜稱尚書右丞上紫金帑
廣語作尚書右丞相紫金袋茲據皇華紀聞改
正餘見南漢紀二考異

尊勝經石幢

存

口漢乾和三年太歲乙巳三月六日壬寅口亡考陳
十八郎敬贖造口口加口佛頂尊勝陀羅尼幢一座
追薦幽途口口物口并乞自身清吉口口長於羅
浮口口口禪院供養設齋慶讚訖

拓本

經文不錄

石幢在博羅羅浮山寶積寺門外

新修廣東通志
新通志阮雲

志一

四

臺師相撰以下所
引但稱廣東通志

蘭修按右記三行口漢至寅口爲一行亡考至
物口爲一行并乞至讚訖爲一行此據拓本較
通志多數字通志作三月八日丙寅考通鑑目
錄乾和三年卽晉開運二年三月爲丁酉朔則
八日非丙寅當作六日壬寅今改正幽途下一
字左半从古第二字右半从吳尚可省識通志
審爲胡悞二字今從闕薦作薦見漢魯峻石壁
畫象按薦省作獬廌字聲義俱別失六書段借
之旨易豫卦釋文正之是也慶讚記金石或作
訖此幢正作訖字

白石秀林記 佚

乾和三年歲次乙酉奉勅鑄石玉皇儀象侍衛九軀并修金籙齋慶讚記臣吳可一撰

王象之輿地紀勝

蘭修按右見輿地紀勝潯州下題云南海乾和白石秀林之記又云白石山在州南六十里下有巖峒卽白石洞天內有清真觀壽聖寺洞門自下入透容州勾漏洞天世傳葛仙翁煉丹往來其間云云案曹學佺廣西名勝志白石山在今桂平縣南六十里南海當作南漢乙酉當作乙巳齋上當有設字傳寫脫誤也

碧落洞天雲華御室記 佚

志一

五

大漢享國之三十有三祀龍集己酉季冬冀開十四葉上以萬機有暇四海無波時屬祈寒節當冬狩九卿扈駕百司隨鑾□巡英州舍於閬石翼日排仙仗整翠華羽衛星羅旗幢雲布嶽靈警蹕風伯清塵上衣龍章絳袍曳鳳文翠綬佩流黃鏤金之劍御飛靈凌崖之輿幸茲盤龍石室者也伏惟大聖文武元德大明至道大廣孝皇帝陛下聖惟天縱功格帝堯味道探元奉眞元之化端拱垂袞返淳朴之風百度惟貞九圍承式因訪清虛之景爰追汗漫之遊斯山之勝槩也得非元化興機巨靈運智丹臺璿室眞爲上帝之居乳竇芝房宛是長生之境白犬吠而壺天晝

永幽禽語而洞壑雲深神草含華元泉瀉瑞於是拂
石牀而設御停玉輦以凝旒遂感龜鶴呈祥河宗效
器俄頃有一道流衣短褐斂容而至自稱野人本無
姓名云昔時葛先生於此石室煉丹砂藥成息炤躡
雲而舉令野人且伏火延神秘丹於靈府并云後五
百載當有真人降此子宜以其還丹呈獻昨畧算之
起重光單闕之歲迄屠維作噩之年將四百九十祀
果合金德主來幸驗真君之言明矣野人因匍匐而
來上喜聞所陳問僊者靈丹何在野人曰咫尺耳遂
捫蘿於峭壁中取出一小石函函上有金書古篆題
九蛻輿地紀勝作光之丹四字內有神丹七粒大如黍粟光

志一

六

影輿地紀勝作彩射人僊者開函取丹躬自持獻野人遽旋
踵隱入石縫間罔知厥止時有近臣奏曰聖上德契
元微感茲靈異尚以兆民係念四海爲心雖獲還丹
未宜輕服上然所奏遂屏左右迺召從臣吳懷恩捧
丹隨御於石室深邃處鑿石秘之眾莫知矣擇日亟
命道眾設壇場陳齋醮以申告謝靈貺由是龍顏開
豁圓蓋舒情緩撫瑤琴弄流泉之激越親灑宸翰奮
睿思之縱橫奏九成之簫韶烟霞縹緲感百獸之率
舞洞府喧闐羣后子來皆朝於禹會眾僊萃至競祝
於堯齡微臣榮列紫垣獲隨鑾輅紀僊靈秘奧之事
媿乏好辭頌聖朝煥赫之功慚無麗藻拜承綸旨伏

積兢惶時乾和七載記廣東文選

偽漢劉氏盤龍御室記乾和七年己酉歲中書舍人鍾允章謨劉氏來遊有道人稱野人云昔葛先生煉丹於此丹成輕舉俾予掌丹候五百歲有來者獻之今四百九十九祀乃捫蘿於峭壁中出一小石函上有金書古篆九光之丹四字中有丹七粒如黍粟大光彩射人既獻丹復入石壁縫間輿地勝紀

碧落洞在英州南十五里懸石如霓旌羽蓋狀傍有小洞號雲華洞深不可窮同上

蘭修按碧落洞在今英德縣南十五里石刻久

志一

佚四百九十祀紀勝作四百九十九祀據文稱起重光單闕之歲迄屠維作噩之年爾雅太歲在辛曰重光在卯曰單闕在己日屠維在酉曰作噩由辛卯推至己酉則四百九十九祀是也

瓊州乾亨寺鐘銘佚

乾亨寺鐘在開元寺有南漢乾和九年鐘銘輿地紀勝開元寺即古乾亨寺也在瓊山縣南橋內曹學佺廣東名勝志

東禪院銅鐘款佚

古銅鐘在崇善縣上刻大漢乾和四年辛亥鑄於東禪院金鑑廣西通志

蘭修按辛亥乃乾和九年志云四年者誤也今
次於九年乾亨寺鐘之下

長慶禪院銅鐘款

存

漢乾和十五年歲次丁巳十一月一日癸未朔二十
日壬寅雲母山長慶禪院沙門神坦普勸眾緣鑄造
洪鐘一口重八百斤上資國祚普及四恩下濟三有
永充供養

拓本

鐘在增城萬壽寺舊志萬壽寺在縣南鳳凰山之
東此鐘款云雲母山長慶禪院地志無此寺名雲
母山卽雲母嶺在城西二十里今鐘在萬壽寺不
知移自何時矣款旣書朔又書一日俗僧所爲不

志一

八

足論也

廣東通志

蘭修按右長慶禪院鐘款濟作澆考北魏齊郡
王祐造像記廣澆爲功正作澆與北齊雋修羅
碑作濟者同一僞體也

感報寺銅鐘款

未見

維大漢乾和十六年太歲戊午閏六月庚辰朔十六
日己未弟子萬華宮使桂州管內招討使特進行內
侍上柱國吳懷恩鑄造鴻鐘一口重五百斤置於梧
州雲蓋山感報寺永充供養上資當今皇帝龍圖永
固聖壽萬春謹記

謝啓昆廣西金石畧

右鐘在蒼梧縣光孝寺高三尺口徑一尺七寸案

十國春秋吳懷恩番禺人內常侍中宗卽位進開府儀同三司乾和中爲西北面招討使此鐘所載懷恩銜十國春秋皆不之及又乾和十六年爲周世宗顯德五年考辭史及通鑑是年閏七月此云閏六月是南漢不奉正朔之證同上

蘭修按以庚辰朔推之十六日當作乙未殆拓本殘缺視之未審也

雲門山匡真大師塔銘 佚

匡真大師塔銘 御書院給事郎雷嶽撰

詳夫水月定形覺浮生之可幻火蓮發豔知覺性之宜修故妙果圓明寂爾而不生不滅真如常住湛然

志一

九

而無去無來祛其華則是色皆空存其實則眾魔咸折亦由山藏白玉泥塗不能汙其珍沼出青蓮塵垢不能染其質者也故匡真大師業傳西裔性達南宗戒珠朗而慧日融光覺海揚而慈霖普潤示非法無法之說若電翻輝應真空不空之談如鐘逐扣以心唯清淨道本慈悲常挑智慧之燈洞照昏衢之路將使化周有截終期證後無爲故我釋迦如來厭綺羅絲竹之音痛生老病死之苦踰金城而學道依檀寺而修真六載成功萬法俱熟爲四十九年慈父演八萬四千法門現百億化身遍娑婆世界說多多緣起開種種導門誓化迷淪令超正覺於時求法寶者是

諸沙數得道果者於意云何小則證須陀洹斯陀含
大則超阿羅漢辟支佛卷舒自在蓮花中藏十二音
聲變現無窮芥子內納三千國土爾後化緣將卒示
滅雙林卽以法衣傳於迦葉葉傳阿難難傳商和那
修修傳優波毘多如此展轉相傳俾令常住世不滅
矣洎至曹侯溪大圓滿至眞起覺大師是爲第三十
三世祖若祇認達磨禪師傳衣法至於曹溪則中華
推爲第六祖焉故西來智藥三藏駐錫曹溪云一百
七十年後當有無上法寶肉身菩薩於曹溪興化學
道者如林故號曹溪爲寶林自祖師成等正覺後現
一百六十九口志作眞生身菩薩遍在諸方行化爾後

志一

十

得道莫知其數皆曹溪之裔也故匡眞大師嗣于一
葉焉師諱文偃姓張氏晉王問東曹參軍翰十三代
孫也翰知世將泯見機休緣徒於江淞故胤及我祖
生於蘇州嘉興縣師幼慕出塵乃棲於嘉興空王寺
志澄律師下爲童凡諸經無煩再閱及長落髮具足
於常州壇後侍澄公講數年領家數分指歸乃辭澄
謁睦州道蹤禪師則黃蘗之派也一室常閉四壁唯
空或復接人無容佇思師卷舒得志徑往扣門禪師
問誰師曰文偃師關門云頻頻來作什麼師云學人
己事不明禪師曰秦時轆轤鑽以手推出閉門師因
是發明又經數載禪師以心機祕密關鑰彌堅知師

終爲法海要津定作禪天朗月因語師云吾非汝師
莫任師遂入閩纔登象骨直奮鵬程因造雪峯會三
禮欲施雪峯乃云何得到詰麼師不移絲髮重印全
機雖等截流還同戴角由是學徒千餘凡聖莫審師
昏旭參問寒燠屢遷摠衣惟切於虛心得果冥輪於
實腹因有僧問雪峯云如何是觸目不見道運足焉
知路雪峯云蒼天僧不明問師師曰三斤麻一疋布
僧後問於峯峯云嘻我常疑個布衲師於會裏密契
元機因是出會遍謁諸山尊宿頗有言句世所聞知
後雪峯遷化學徒乃問峯佛法付誰峯云遇松偃處
住學徒莫識其機偃者蓋師名也至今雪峯遺誠不

立尊宿辛未禮於曹溪旋謁靈樹故知聖大師以心
機相露膠膝契情歲在丁丑知聖大師一日召師及
學徒曰吾若滅後必遇無上人爲吾茶毘至戊寅高
祖天皇帝巡狩韶石幸於靈樹知聖遷化果契前
約敕爲爇之獲舍利塑形於方丈於時詔師入見特
恩賜紫次敕師於本州廳開堂師於是踞知聖筵說
雪峯法實謂禪河涵湧佛日輝華道俗數千問答應
響郡守何公希範禮足曰弟子請益師曰目前無異
草有人問如何是本來心師云舉起分明別有言句
錄行於世爾後大師心唯恬默奏乞移菴奉敕俞允
癸未領學志開雲門山五載功成四周雲合殿宇之

簷楹翼翥房廊之高下鱗差邃壑幽泉控暑月而寒
生戶牖喬松修竹冒香風而韻襍宮商近於三十來
秋不減半千之眾歲納他方之供日豐香積之厨有
殊舍衛之城何異靈山之會院主師傅大德表奏造
院畢功敕賜光泰禪院額及朱記至戊戌歲高祖天
皇大帝詔師入闕帝問如何是禪師云聖人有問臣
僧有對帝曰作麼生對師云請陛下鑒臣前語帝悅
云知師孤戒朕早欽敬宣下授師左右街僧錄師默
而不對復宣下左右曰此師修行已知蹊徑應不樂
榮祿乃詔曰放師歸山可乎師欣然山呼萬歲翌日
賜內帑香藥施利鹽貨等迴山并加號曰匡真厥後

每年頻降頒宣繁不盡記恭惟我當今大聖文武元
德大明至道大廣孝皇帝歲在單闕運聖謨而手平
內難奮神武而力建中興恩極八紘道宏三教乃詔
師入內經月供養賜六銖衣一襲香藥施利等而迴
并御製塔額預賜爲寶光之塔瑞雲之院師自從示
眾卓爾宗風凡在應機實當奇特常一時見眾集久
乃云汝若不會三十年莫道不見老僧時有三僧一
時出來禮足師云三人一狀有問禪者則云正好辨
有問道者則云透出一宗有問祖師意者則云日裏
看山有纜跨門者則以杖打之有時示眾云直下無
事早是埋沒也迷緣不已豈是徒然畧舉大綱將裨

往代師以法無定相學無准常每修一□□

志作用
忌齊

酬二□□

志作
嗣諱

師一坐道場三十餘載求法寶者雲

來四表得心印者葉散諸山則知覺路程開雙林果
滿諸漏已盡萬法皆空雖假臥譚未少妨於參問終
云虛幻乃示寂以韜光侍者奉湯師付盃子曰第一
是吾着便第二是汝着便記取修表祝別皇王乃自
札遺誠曰吾滅後汝等弗可效俗教着孝服哭泣喪
車之禮則違佛制有紊禪宗也付法於白雲山實性
大師志庠師會下已匡徒眾已西歲四月十日子時
師順世嗚呼慈舟壞兮輪迴失渡法山摧兮飛走何
依緇倫感薤露之悲檀信動式微之詠宋雲遇處但

志一

十三

攜隻履以無還慈氏來時應召三峯而再出月二十
有五諸山尊宿具威儀道俗千數送師於浮圖靈容
如昔依師訓塔於當山方丈內法齡七紀二僧臘六
旬六於日行雲斂態隴樹無春覩嶽孤猿啼助哀傷
之苦穿林幽鳥聲添惜別之愁弔客掩襟佇立以泣
在會參學小師守堅始終荷贊洞契無爲門人淨本
大師常實等三十六人知事皆明佛性雅得師宗也
在京弟子報恩寺內供奉七十餘人皆出自宮闈素
精道行敕賜與師爲弟子法經內僧錄六通大師教
中大法師道聰洞容本門尤精外學也嶽鏤冰藝薄
映雪功疎自愧斐然濫承厚辟編成實性紀彼貞珉

銘云

師歸何處超然寂然愛河萬頃涉若晴川 恩超四
果難降眾魔迷則眾劫悟則刹那 是色非色真空
則空如水涵象若燭隨風 雖云有佛難窮於佛如
地有芽逢春自出 菩提無種覺花無子妙果如成
有何生死 是法非法恍惚難尋無內無外卽心傳
心 劫名成灰兮邱陵潛燬大海爲田兮人倫斯改
紀師實性兮刻於貞珉龍華會開兮師蹤如在

漢大寶元年歲次戊午十二月一日建

乳源縣志

蘭修按右匡真大師塔銘見乳源縣志考曹溪
六祖分爲二派曰青原思曰南嶽讓南嶽復分

志一

十四

二派曰臨濟曰滄仰青原分三派曰曹洞曰法
眼曰雲門是爲五宗文偃則雲門嫡嗣也是銘
文辭清麗足與陳守中碑並稱惜諸書俱未著
錄雷嶽十國春秋無傳結銜稱御書院給事郎
亦百官表所未及也

寶林禪院銅鐘款

存

粵維大寶二年太歲己未七月甲辰十九日壬戌樂
昌黃蓮山寶林禪院住持長老明徽大師賜紫沙門
義初召眾緣鑄造銅鐘壹口重肆伯斤勸首弟子給
事郎守內侍省內府局令都監樂昌防遏諸都并監
樂昌縣事賜紫金魚袋鄭敬贊以七月二十八日設

齋慶讚永充供養 奉敕鐫題黃蓮山銅鐘壹口官
力 拓本

鐘高二尺四寸圍四尺口五尺紐高五寸圍二尺
凡鑄金之文陽識易成陰款難鐫三代銅器用陰
款秦漢則多用陽識此文乃是陰款尤為難得

東粵金石畧

右黃蓮山銅鐘題字凡四行文云云考韶州府志
樂昌縣有寶林寺宋嘉祐三年僧圓祐建無所謂
寶林禪院者至黃蓮山則志乘失載訪之樂昌人
亦尅能舉其名矣

錢大昕潛研堂金石文跋尾

鐘在韶州新建文昌廟粵東金石畧云此鐘不知

志一

十五

何時移於韶州府學明倫堂今又從明倫堂移來
者也奉敕鐫題以下十三字字體天斜疑與鐘款
非一時所鐫緣从彖鐫从門皆別體字

廣東通志

蘭修按款云鐘壹口重肆伯斤考儀禮士冠禮
壹揖壹讓疏一壹通用漢書食貨志有伯阡之
得師古注阡謂千錢伯謂百錢唐尉遲恭碑米
粟壹阡伍伯石唐岱岳觀碑年月用貳叁肆捌
玖拾等字蓋古人偶爾段借至唐時公牒多用
之觀此識及長壽寺大寶七年鐘款

重銅壹阡貳伯陸拾

斤猶沿舊習也禮記節以壹惠鄭注壹讀爲一

正義曰經文爲大壹鄭讀爲小一今人稱壹貳

字爲大一二字爲小其來久矣

宴石山記 未見

新開宴石山記 □□□容州管內都製置鹽鐵發
運等務並白州永資院點檢義勝等都□務□賜紫
金魚袋劉崇遠 蓋聞住非聲而去非色無滅無生
視不見而聽不聞有□有□三空俄顯一德爰彰善
念必通勤行可學明明宗旨歷歷程途實有路以堪
躋□□門而可入自是心源不透智筏未征達彼岸
以何由湊元關而莫迨崇遠自親禁掖厚忝渥恩凡
覩靈蹤悉虔俗志冀精勤於一善上報答於九重宴
石山者在白州博白縣之西鄉與馬門灘伏波公之

志一

六

祠鄰近圖經云昔有神人稱陳越王今有古宮基址
見在廉州合浦□□□曾宴於此山故以爲名焉其
山也西枕清波南連翠□曉則輕雲簇白晝則遠樹
攢青石罅泉噴點點而斜飛皓雪□□花秀萋萋而
密綴紅□左紉右迴前龜後鶴蔬足果足松寒竹寒
昔曾有人臨水□□作佛像約高五丈餘未窮其年
代者矣□有壬向石室一所唐咸通中高相座□統
十道兵師禦八蠻疆境經行之際於此□塑造佛像
今以□□崇遠因監製運遂切經營乃命良工闢爲
精舍一山迴轟兩室相鄰□是以黑金鑄釋迦瑞像
設於東室又鑄釋迦牟尼佛一座兼別鑄五百阿羅

漢□□羅漢設於西室其次有石引廊齋堂僧房等
在於室外請僧師肇道志惟敏惟忠住持焚修□則
飛章聞奏皇澤爰頒賜額號於□□今爲覺果之禪
院□謂覺乃大覺之□果乃勝果之門覺與果齊果
因覺集□□□外天鑿洞臨致去石嵐永爲勝地又
別有東峯石山一座中有東西南北四室窺峩若畫
礪硯如鐫直疑乎造化剜開又恐是神仙斲出多景
多致惟煙惟霞亦以黑金鑄玉皇道君老君天地水
三官竝塑左空右元真人玉童玉女左右龍虎君元
中大法師設於室內卓爾威儀森然侍衛請道士廖
德崇劉守清盧守和等別建道院住持焚修以乾和

十五年丁巳歲八月二十三日建迄於大寶元年
戊午歲十二月二十七日畢功建置道場設齋慶讚
訖莫不青蓮金柱如切利以初來錦舌蒼肝似藥珠
而乍降繇是命乎緇侶招彼羽人金爐曉炷以飭馥
銀炬宵燃而炫耀用全因果上贊休明□來四海之
朝宗盡類眾星而拱極功旣畢矣願且周焉可以齊
嵩華之堅可以並江河之永靈基勝跡萬古千秋時
大漢大寶二年太歲乙未九月癸卯朔二十四日丙
寅記 晨輝殿使知白州軍州事都管勾容州管內
都製置鹽鐵發運等務朝請郎檢校尚書工部員外
郎□柱國賜緋魚袋樊匡嗣榮秉郡符同崇□勝祉

左靜□□□□□□□□□□□□□□□□□□都部
領將金紫光祿大夫左領□將軍檢校刑部尙書□
□□□□□上柱國蔡彥宏 寧遠軍節度衙前兵馬
使充製置務表狀孔目官口昭書 製置務客司軍
將李道員鑄廣西金石畧

五季文章趣卑陋甚矣然當時諸僭偽其國頗亦
有人吾頃遊博白之宴石山號普光禪寺者爲屋
數椽而已其山迴絕洞穴奇怪得一碑乃偽漢時
人爲寺記特喜其兩語曰蔬足果足松寒水寒蔡條

鐵圍山叢談

右記在博白縣案縣志云宴石山在頓穀堡與紫

陽巖相連兩地寺觀皆劉崇遠闢建僭竊之世具
此物力取於民多矣己未周恭帝顯德六年也記
爲覺果禪院作蔡稱普光寺者宋時改名又竹寒
蔡作水寒視之不審耳廣西金石畧

蘭修按劉崇遠樊匡嗣蔡彥宏李道員十國春
秋俱未見崇遠記云自親禁掖厚忝渥恩云云
蓋宦者匡嗣結銜稱晨輝殿使十國春秋百官
表無之當亦內職其稱都製置鹽鐵發運等務
承資院點檢知軍州事工部員外郎都部領將
節度衙前兵馬使製置務表狀孔目官製置務
客司軍將皆足補百官表之闕

拓路記 存

以大寶三年庚申歲月在仲冬開拓此路為畱題記
拓本

右拓路記其文云云凡三行二十字行書頗縱逸
在潮州府西湖旁大石上金石家未有著錄者益
都李南澗知潮陽日赴郡游斯湖始見而拓之

堂金石
文跋尾

修慧院鐘款 佚

修慧院在東莞縣東監南漢大寶三年內承宣使
劉廷威鑄鐘二百五十觔置院中後改慧雲寺

府志

南漢大寶三年鐘永樂間為盜竊去 粵東金石畧

乾亨寺銅鐘款 未見

維大漢大寶四年歲次辛酉九月辛酉朔二十五日
乙酉鑄造銅鐘一口重一千五百斤於乾亨寺永充
供養僧正大德崇愍都監大德行超監寺大德都維
那僧楚彤住持從義楚澄縈然戒詮智暹知亮宏遇
西頭供奉官都監賀州防拓應援等軍並監賀州事
徵事郎守內侍省內府局令賜紫金魚袋梁延康管
甲指搆使全友誠劉處詳佐遷內承旨黃守鐔指搆
使陳匡遠左雄勇指搆使都監賀州應援軍銀青光
祿大夫檢校刑部尚書兼御史大夫上柱國郭達西

頭高品譚文定西上閣門使副權錄事參軍梁延福
郭居弟子楊德威廖師進宋居訓黃進又詹延達
鄧承潤王廷猷梁承選蕭彥鐫黃仁祚李延亮孟漢
璿劉意琅黃少璘陳延福胡延舉蕭彥湘王景起莫
少宣陳進清孟漢達孟意通陳德用姚宏雅黃仁裕
虞從慶卽鄰倫延綬嚴匡演楊燦李常溫廖延通李
延意莫楷虞才訓 女弟子蔣氏六娘黃二娘徐四
十娘李十四娘虞二十一娘陳二娘歐陽十八娘陶
五娘李二十八娘馮一娘 高品銀青光祿大夫檢
校國子祭酒兼侍御史柱國莫道贊翰林口待詔文
林郎試大理評事王師訓 眾緣應援軍十將盧法

志一

三

住龐保定楊僧羅法寧劉光美李善能楊象封弩陳
令簡鄧會陳道情梁雪羅貴楊道意楊公海覃廷儀
潘廷美馮金劉迢何匡韻龐婺兒伍僧會潘楚規楊
軍朗梁瑤盧嫩龔硯楊知蘇蘊黃延集楊虔吳採龐
奴甯舍梁彥通梁幼余戀甯光包邵兒洗初鍾添唐
勝梁云慶堯保成劉史乾亨寺住持僧宏遇善儒志
寬善慧寺監寺大德緣集法喜正惠禪院監院大德
智堅西山勝果寺監持大德惠長寺主契真仁王寺
監寺大德善德峽山寺大德從惠審依東南道靈化
寺大德延浦 鑄造匠人梁道崇顏位鄧珠書人區
昱鐫字匠人齊公延齊公握阮仁與田從訓 眾緣

弟子馬軍郭道崇陳延嗣何懷堅李懷進梁道崇李
廷真區彥從錢珣唐緒顏位陳彥詳防拓軍十將何
肱聶軻王畋成行柔阮敬芝張利保區珍陳廷桂李
辛宋從順楊廷懿蘇全志植昌鍼陳豐陳癸黎小錐
陳保得吳甯收區昱鄧珣楊廷慶凌孟益羅敬文黎
匡克黎崇徽陳法善梁觀音林光嗣禰慶眾張僧養
林讓梁匡錫陳延智何佛養陳延壽梁保志馮僧保
李文叨陳潘久蘇亞張料六梁保綬何廷泛劉道誠
梁敬遷梁度嚴畱梁光嗣吳佛保陳公遠區延志聶
再隆陳彥嵩盧光志王佛壽劉韶向延古陳佛看蘇
保兒蒙愛梁延愛梁和尚莫宋張佛王老徐嫩植崇

志一

三

保梁懷徹盧延保區紹陳承鄴黃知道王期陳師黎
佛念鄧法護洗光嗣李張盧郝封善修盧從蘊陳思
憲 女弟子陳三娘區四娘宋九娘李八娘陳二娘
任八娘簡十娘王一娘劉二娘李九娘廖二娘趙十
六娘徐九娘何一娘陳一娘 左廂都押衙知桂嶺
縣事歐陽敬忠右廂都押衙梁存忠防城都押衙黃
延靜四界馬步都虞候知馮乘縣事孟漢雋馬步都
虞候莫慶承典議郎守連山縣程崇珪捕賊官陳子
勳虞承遠馮令瑁軍事孔目官知寶城場務虞延愨
鼓鑄都勾孔目官知富川縣梁珠軍事押衙官勾蕩
山縣科敬楊蘊讀示孔目官鍾全美廳勾孔目官陳

昌鼓鑄孔目官鍾虔眇曹都鍾仁英州司孔目官虞保忠陳承保黃承畔表奏孔目官費沆虞仁贊王廷規虞仁祚倉督廖仁亮臨賀縣都行耆壽虞師岳陳子璩歐陽續桂嶺縣都行耆壽李罕餘富川縣都行耆壽王漢膺董仁興馮乘縣耆壽何仁富蕩山縣耆壽黎霜層寶城場行首賓懷祚

廣西金石畧

右鐘在賀縣三乘寺高四尺五寸口徑二尺五寸四面皆有款文凡千餘字其官位及僧徒稱謂亦足考一時之制內多異姓如洗慶植禰科賓之類禰音喧今南中尙有此姓而洗或作洗觀是鐘知其誤自五代時已然大寶辛未爲宋太祖建隆二

志一

三

年考史是年九月朔壬戌此云辛酉差一日也

同上

蘭修按右鐘款職官三十七人耆壽九人眾緣一百七十三人工匠八人女子二十五人僧二十二人職官梁延康等十國春秋無攷結銜稱西頭供奉官西頭高品西上閤門使副內承旨御史大夫侍御史國子祭酒翰林院侍詔大理評事知縣事知場務都監防拓應援等軍管甲指搗使錄事參軍左廂都押衙右廂都押衙防城都押衙軍事押衙官馬步都虞候軍事孔目官都勾孔目官廳勾孔目官鼓鑄孔目官州司孔目官表奏孔目官讀示孔目官捕賊官倉督

皆十國春秋百官表所未載也

昭州光孝寺銅佛識 佚

銅佛識在昭州報恩光孝寺殿貯銅佛一軀趺坐蓮花中偽劉時所鑄高一丈二尺濶六尺座高七尺縱廣一丈巨拇圍五寸他稱之金蘭寶障皆銅所範妙極精巧後有識云維大漢大寶四年

輿地紀勝

蘭修按昭州今廣西平樂縣嘉靖廣東通志云

光孝寺庫中有銅釋迦像一尊高一丈羅漢一十六尊各高二丈南漢大寶二年鑄乃開元寺舊物云云此廣州光孝寺也其時銅佛所在有之僭偽之朝窮極物力以邀福祚而民怨自此

志一

三

深矣悲夫

漢大寶二年鑄
光孝寺銅佛識
中書省一宮本